



Орган Лемковского Союза.

Выходит в каждый четверг.

Редакция и администрация в Крынице. — Адрес „Лемко” Крыница.

Всіх читателєй, котры не вплатили ище пренумераты, просиме выровнати якнайскорше рахункы.

Также просиме присылати членскы вкладкы до Лемко-Союза.

Просиме присылати материал до календара на рок 1936.



Пренумерата в краю:

30 грошей місячно,

80 „ квартално

1.50 „ полрочно,

3 зл. рочно.

В Амерыці: 1 дол. рочно.

В Чехословакии:

2 кор. місячно, 10 кор. полрочно,

20 кор. рочно.

Конто чекове Нр. 404.155.

Програма нового правительства.

Дня 14. жолтня отбыло ся засіданє Рады Министров под председательством премьера Марьяна Зындрам-Косцялковского, на котром премьер Косцялковский подал до відомости заявленє, котре подає ся в скороченю:

По уконстытуованю ся законодательных палат Пан Президент Р. П. покликвал нове правительство под моим председательством, указуючи єму, яко головну задачу предпринятє старань над розвитєм экономичных сил общества и державы и укріпленєм господарчого организма, ослабленого послідствами долготривалой світовой кризи, котра стіснила основы быта загала населеня.

Має быти удержана сила оружна, а особливо сила оборонна Польши. Одновременно усилия нового правительства маот ити передовсем в напрямі поднесеня господарчого жита и змягченя послідств загальной кризи.

Воля правительства єст запрячи до той борбы о розвитє жита господарчого всі здоровы, творчески и активны общественны организации, а также усунути всі тамы, котры стісняют штучно и непотребно розвитє задач публичного господарства и здоровой приватной инициативы.

Правительство рішило зробити всьо, штобы заховати мирны отношения медже народами світа, задержати прислужуюче державі медженародне, значенє удержати валюту и недопустити до жадных непристалых господарчих експериментов.

Понадто правительство уважат за конечне предприняти рішительну борбу о ровновагу бюджета и сорганизовати господарчу политику державу на основі одностайной и ясной програмы, стремящей передовсем до оживленя внутреннего рынка.


Таксамо правительство уважат за доконче потребне сотворити ширши возможности в открытю новых путей труда для молодого

поколіня, багнуци звязати єго сильно с интересами державы.

Одыноком дорогом до поправы загального экономичного господарчого положеня Польши єст розумне и націховане добром волюм напряженє всіх сил правительства и населеня в напрямі сорганизованя труда. Чим больше буде жертвенность и охота до труда, тым скорше перебеѣме ся ку лучшим условиям жита и тым певнійше обезпечиме екзистенцию милионам терпячих днеска нужду граждан.

Правительство здає собі справу с тяжахив на нем обовязков и ответственности, котры накладывают на него тяжке экономичне положенє, але о вартости народа свидчит вытревальность и спокойне поборюванє трудности самым народом.

Тож если сам народ зрозуміє наміреня правительства и в тых наміренях попре правительство и разом с ним возьме ся щиро до работы, то не лем правительство выявляє ся с принятой на себе ответственности, але одновременно даст населенє реальный выраз тому, же отчул глубоко тоты указания, котры оставил по Собі Вожд Народа Польского Осиф Пилсудский.



Сейм и Сенат Р. П. в Кракові

складат честь Маршалу Пилсудскому.

С суботу дня 12. жолтня нарочным поїздом приїхала до Кракова прогулька послов и сенаторов в цілі отданя чести у трумны Маршала Осифа Пилсудского.

В прогульці той приняли участь маршал Сената, Прыстор, маршал Сейма, Цар, ви-

цемаршалы Сейма и Сената, послы сенаторы и бюралисты Сейма и Сената.

Прогульку привитали представителі властей с воєводом Рачкевичом и президентом міста, Каплицкым во главі.

О год. 9. в Катедрі на Вавелю отслужил метрополит Сапєга заупокойне богослуженє, по котром члены обох законодательных палат перешли до крыпты св. Леонарда, где в глубокой тишині отдали честь Маршалу Пилсудскому.

Погодивше прогулька оглянула комнаты вавельского замка, а пак перешла до ратуша, где привитал их президент міста, Каплицкий. За теплы привитальны слова подяковал маршал Сената, Прыстор и прогулька поїхала на Совинец, где приняла участь в сыпаню копца и вписала ся до памятковыи книги.



С воєнного фронта в Африці.

Война италиянско-абисынска єст ведена со змінным счастьем. Италиянскы войска, котры початково посували ся скоро в глубину Абисынии, тепер попадають на штораз больши перешкоды. На полночном фронті находят ся в италиянских руках три міста, Адуа, Адиграт и Аксум. Тото послідне місто єст уважане через абисынчиков за місто святе. Там коронуют ся всі цисары абисынскы. Абисынчики бояли ся, же италияны в разі обороны міста, начнут бомбардовати місто и знищать єго и прото не боронили Аксум и опустили єго без боев. Але на том кончат ся sukcesы италиянов. В послідных днях доносят корреспонденты с Аддис-Абебы, же

вздержано уж италиянску офензиву

и же положенє италиянской армии стає ся с каждым днем тяжше.

Каждый день укрепят силы абисынчиков о новы тысячи умундурованных и добре вооруженных вояков. Транспорты оружия и амуниции ідут до Абисынии всіма доступными дорогами. На желізнодорожной штрєці Джибутти—Аддис-Абеба єст задержанный пассажерский рух и штрека тотта служит выключено для перевоза военных транспортов.

До Джибутти в найближших днях приплывають два кораблі японскы и німецкы с великим ладунком оружия для Абисынии. На жел-дорожн. штрєці Джибутти—Аддис-Абеба курсують для перевоза оружия великы товарны транспорты, зложены с 10—15 вагонов.

От стороны египетского Судану приходять до Абисынии великы караваны с оружием и амуницией. Ряд правительственных домов в Аддис-Абеба єст на приказ цисара заміненый на арсеналы, бо военны склады сут уж переполнены.

Абисыния достає 12 самолетов.

В Аддис-Абеба ждуть нетерпеливо на 12 самолетов для абисынской армии, котры має прислати Англия.

Для обслугы тых самолетов сут уж приготовлены по европейскы чорны летчики. Вышколили ся они в основаной нароком для них школі под руководством американского мурина, Робинзона, котрого называют чорным Линдбергом.

В военных кругах абисынских надіють ся, же их летчики уж в коротком часі начнут робити атаки на зады италянской армии и метати бомбы на италянскы стратегичны пункты, а особенно, на склады военных материалов в Ерытреи.

Концентрация абисынских войск.

В Аддис-Абеба концентрируют ся абисынскы войска. Приходит там 100.000 воєвников с провинции Волло, котры творят резерву. Понадто через місто має перемашеровати 50.000 вояков с Каффы, 30.000 вояков с Иллубадур и 50.000 с Онеллага.

В звязи с приходом тых полдикых отділов доходит до непрерывных инцидентов на почві ненависти до европейцев, котрых всіх уважают ся за италянов.

Польша знесла заказ продажи оружия до Абисынии.

Сталый делегат Р. П. при Лигі Народов, министр. Комарницкий выслал генеральному секретару Лигы Народов письмо, в котром повідомил его, же Правительство польске не выдаст жадного зарядженє, маючого на цілі вздержанє або ограничена вывоза або транзита оружия, амуниции и военных материалов, перезначеных для Абисынии.

Ци дойде до войны италянско-англицкой.

Англицкы газеты подають, же французский премьер Ляваль зажадал от Англии выцэфаня войск морских с Середземного Моря. Мало бы то быти першим кроком до начатя переговоров о мирне уладженє конфликта. Отвіт, який на то достала Франция єст невдоволяющий и амбасадор Вел. Британии в Парыжі одержал порученє от своєго правительства заявити Лявальови, же Англия уважаєт за конечно потребне удержанє средств безопасности в формі присутства англицкой флоты на Середземном Морі.

В случаю перекроченя границ италянско-англицкых в Африці через войска италянскы, Англия єст готова начати военны действия против Италии и жадат от Франции помощи.

Гиены пожерають тіла раненых вояков.

Абисынский Червеный Крест в Аддис-Абеба выслал до централі в Женеві телеграфично просьбу о помоч. По поводу малого количества лікарей и сестр милосердя, котрыма распоряджат абисынский Червеный Крест, ранены абисынскы воякы лежат нераз по пару дней на поли брани, где атакують их гиены и москиты. В тых условиях праві все раненых вояков пожерають гиены.

Таксамо бракує Червеному Кресту лікарств, а особенно хинины.

Греция - монархиом.

В марті т. р. розгоріла в Греции кырвава домашна война. Як знаме, во главі революционероу станул выдающий ся републиканец, Венизелос, котрый по здавленю револты мусіл утечи за границу.

От того часу в Греции, жиє ся на вид спокійно, але переживат она великы перемены. Сторонники монархии двигали голову штораз вышше, аж наконец добились своєго, не ждучи ани на зарядженый через власти на день 3. листопада плебисцит, в котром населенє мало ся выповісти о формі правления в Греции.

Дня 10 т. м. явили ся у премьера Тсалдариса высши офицеры и зажадали от него безотложного привернення монархии в до розі голосованя народного собрания.

По том жаданю офицеров скликано засіданє рады министров, на котром правительство подало ся до дымисии. Высши офицеры звернули ся до дотеперешного министра войны, генер. Кондылиса с просьбом, штобы станул во главі правительства. Ген. Кондылис згодил ся на то и утворил нове правительство.

Ген. Кондылис был ище перед половином року предводителем републикан, пак переініил политичны переконаня и стал ся зажертым монархистом и тепер узнал момент за подходящий до реализаций монархистычных плянов.

Собранє народне собрало ся того самого дня вечером и рішило переініити порядок републиканский на порядок монархистычный. До часу поворота короля Юрия, котрый от 1923 року жиє стало в Англии, ген. Кондылис буде регентом.

Плебисцит, заряджанный на 3 листопада буде мати за предмет утвердити рішенє о привернення монархии.

Концентрация войск и границі альбанско-югославской.

На границі альбанско югославской концентрируют войска. Правительство альбанске змобилизовало уж 7 рочников. Зарядженє Альбании єст в звязи с концентрацией югославской армии над границом Альбании. На альбанску мобилизацию дала Италия пожичку в сумі 2½ миллиона фунтов стерлингов (около 68 миллионов злотых).

До кого належит світ?

Перешло половина земельной кулі єст под панованєм пятох великих держав: Великой Британии, России, Сполученых Держав Полн. Амерыкы, Японии и Франции.

На першом місци стоить Англия, котрой домини и кольонии занимають пространство 13.356.759. миль квадратных и обнимають 450 миллионов жителей. Друге місце занимает Россия, котра має 175 миллионов жителей, третє Сполучены Державы о 140 миллионах жителей, дальше Япония—125 миллионов жителей и Франция—110 миллионов людей.

Перенесенє тіла бл. п. министра Перацкого.

В минувшү субботу дня 19. т. м. отбыло ся заупокійне торжество перенесеня тіла министра внутренних діл бл. п. генерала бригады Бронислава Перацкого с дотеперешной гробницы до мавзолея на старом цментері, положеном в центрі міста.

В том торжестві приняли участь члены нашего правительства с премьером Марьяном Зындрам-Косцялковским во главі, представителі властей воєводских и повітовых, представителі всіх организации, школы, уряды и громад и много, много людей. По выслуханю заупокійного богослуженя, отслуженого в цментерной каплиці, зложено домовину стілом в нововыбудованный мавзолей. Погодивше цілым походом рушено перед начату будову „Дома им. Министра Б. Перацкого, где по поблагословеню угольного камня высказал премьер Марьян Зындрам-Косцялковский бесіду, посвячену памяти бл. п. мин. Б. Перацкого.

Примір достойный наслідованя.

Першим селом, котре откликнуло ся на призыв жертвовати продукты нашей бурсі в Горлицах єст Перегримка, ясельского повіта. Довідуєме ся, што тамтого тыждня доставлено до бурсы фуру картофель, горох и капусту, а кромі того повідомлено заряд, же друга порция приде на днях.

Честь и слава перегримчанам за их отклик! Они перши зрозуміли належито (и ділом доказали, свою сознательность), што наша бурса єст одынокым осередком воспытаня нашей будучой народной интеллигенции и поддержати ю мають вшиткы лемкы. В ей розвтыю заинтересованы мы вшиткы, а не лем члены и родичи учеников.

Дякуєме красно всім жертводателям, а голвно о. сов. Мышковскому и єго Дому за организацию збора и привоз своима коньми собранных продуктов.

ПОМІЩАЙТЕ
ОГОЛОШЕНЯ
В ГАЗЕТИ „ЛЕМКО“

КОТРЕ СЕЛО ПОСТУПИТ СЛІДАМИ СОЗНАТЕЛЬНЫХ ПЕРЕГРИМЧАН?

Зазначаме, же не лем бандуры належит зберати, але можна и инны продукты, а головно дерево. Шмарме по одном дровні,— а тепло буде нашим воспытанникам.



Редакция додає, што одержує численны письма с рїзных сел, в котрых дописователї доносят, же люды охотно поспїшат с жертвами на бурсу в Горлицах, лем треба, штобы заряд бурсы росослал по селах писменны отозвы, адресованы до поодынокых наших людей, або до сельских организации. Тоты люды, котры достанут отозвы, доберут до себе ище лвох, трох и с нима составлят комитет, котрый займе ся збором пожертвовань.

От выділа Руской Бурсы в Горлицах.

I.

По случаю приближающого ся Общого Собрания членов Общества, выділ подає до відомости слїдующе:

1) вшиткы члены повинни взяти участь в рочном собраню Общества и разом рїшати о его ділах, плянах и т. д.,

2) вшиткы члены повинни тепер, або на Собранию заплатити членску вкладку за тот рок,

3) родичи находячих ся в бурсі учеников сут тым самым членами бурсы и повинни взяти участь в Собранию,

4) вшиткы сознательны Лемкы повинни вписати ся в члены одынокой руской бурсы на Лемковщині. Членска вкладка виносит 3 зл. рочно (для интеллигенции 6 зл.), а вписове 0.50 зл. Записати ся можна на Общом Собранию.

б) Особных повідомлень, ци запрошень на Собранє, котре отбуде ся 27. т. м. (неділя) не розсылає ся.

II.

Выділ О-ва „Руска Бурса в Горлицах“ с душевном радостью и глубоком благодарностью витат инициативу дакотрых наших людей в ділі организации збора пожертвовань продуктами на цілі бурсы.

От себе выділ просит горячо вшиткых русских людей в міру сил и можностей переводити у себе такы зборы продуктов и доставляти до Горлиц.

Заряд бурсы прийме с сердечном благодарностью всякы продукты, як горох, фасолу, цыбулю, морков и т. д., а передовсем бандуры и опалове дерево, о котры зрештом на селі найлегче.

Просиме солтысов, або передовых русских людей сорганизовати комитеты с 2—3 особ, котры бы заняли ся збором и доставом до Горлиц.

Выділ бурсы просит выяснити людям, што зберат ся не для того Штефана, ци Феца, котрый єст в бурсі с вашого села, лем зберат ся для бурсы, яко осередка, где наша лемковска молодеж одержує [належитые] выхованє, приготвленє до будучой народной работы и возможность науки.

Брак нашой народу отданой интеллигенции отчуваме на каждом кроці, а головно тепер в так тяжких часах для нас вшиткых,— тож дбайме о того, штобы мы дождали ся ей як найбільше и як найскор-

ше, а тогда и прудше с нами каждый буде ся числити, а не оминати нас и не даме ся быле—кому баламутити!

Вшиткы пожертвованя будут оголошены в газетах.

Выділ

О-ва „Руска Бурса“
в Горлицах.



КОРОВЫ НАЛЕЖИТ ДОБРЕ И РЕГУЛЯРНО ВЫДОИТИ.

Тепер, коли так трудно о гроши, мусиме дбати о каждую дробну річ, котра причинят ся до увеличеня нашего дохода. Таком малом річом єст медже иншими добре выдоєне молоко, котре быват дост часто занедбане. Часто газдыня змордована цілодневном роботом не выдоєє належито молоко, бо розумує ошибочно, же чого корова не отдаст рано, тото даст в полудне або вечером.

Єст то розумованє совсем ошибочне. Молоко вытворює ся в организмі коровы специальными молочными золозами, котры сполняют свои дійства так долго, покля вымя ся не выполнит. Если в икрі при доиню сохабиме кус молока, то золозы вытворят его о того количество меньше, так само, як до литрового горняти, в котром єст уж пол литры воды, можна доляти лем пол литры, а не цілу літру.

Тож если в вымени буде оставати ище кус молока, то понятно тратиме, бо золзы вытворяют его меньше, а если будеме так рсбити все, то золзы привыкнут до того и начнут вытворяти меньше молока, як в случаю, коли корова єст добре выдоєна.

Але в даном разі заходит ище инша втрата. Як відомо найважнїшом складовом частьом молока єст толщ. В дакотрых молочарнях платят лем за толщ, а молоко худе вертат ся газдам. Ясна єст річ, же чим веце толща містит в собі молоко, тым має оно высшу ціну и вартость. Тож оказує ся, же чим больше зближає ся до конца доиня, тым молоко єст маснїйше. Неодному може выдати ся тото дивнє, але так єст на правду.

Пороблены в том напрямі дослїды потвердили тото цілковито. Перед килькома роками переведено пробу, полягаючу на том, же ціле молоко поділено на 20 порции, с котрых каждую собрано в отдільной посуді. По дослїдах показало ся, же перша порция молока, аджек на початку доиня, містила в собі 0.40 1/8 толщу, друга — 0.35 проц., трета — 0.40 проц., четверта — 0.50 проц., пята — 1.50 проц., шеста — 3 проц., сема 4 проц., а двадцета—последна 10.30 проц. Як видно с того в последных порциях была праві сама сметанка.

Газдыня при доиню сама не знає о том, яке молоко корова дає и аж отвітны дослїды стверджают, же часто на наших очах можут заходити певны явленя, существованя котрых ани никто не подозревал. Дослїд повысший доказує, же через недокладне выдоинє тратиме наймаснїйше и найціннїйше молоко. При доиню треба о том все памятати, особенно в осени и зимі, коли молока єст меньше и єст оно найдорозше.

Другом барз важном справом при доиню єст тото, штобы дойти коровы все о одном и том самом часі.

Корова добре и регулярно доєна, даст нам веце молока и тото молоко буде ліпше. Вартат аджек о том памятати, бо не коштує тото нич, лем вымагат акуратности и дбалости

ОЩАДЖАЙМЕ НА ЧАСІ И НА РОБОТІ.

Нїт праві никого, кто бы не хотіл робити даяких ощадностей. Але при дневных выдатках в домашнем господарстві иде тото тяжко, бо нїт на чом щадити.

Єст однак кромі грошей другий капитал и ним єст наш труд, наша работа, здоровлє и час, котрых мы не ощаджаєме особенно на селі, где никто не жиє по годинам. До штодневной работы мы привыкли, на часі и так нам не залежит, а о здоровлє дбаєме мало. Жиєме в безпрерывном кераті домашного занятя, не мыслячи совсем о здоровлю и не здаючи собі справы, же єст ище друга форма ощадности, а том єст ощадность часу и работы.

Оден господар обчислил суму втраты часу и энергии в работі на грунті. Обрахунок тот, хоц неточный, дає нам от части ноняте, якы великы втраты потягат за собом недостаток умілого сорганизованя работы в господарстві.

Доказує он, же если каждый газда в Польщі стратит на непотребне лаженє 5 дней часу в році, то в виду существованя 3 миллионов господарств — всі господары разом тратят 15 миллионов дней работы, котры, числены по 2 зл. денно, робят суму 30 миллионов зл. рочной страты в ролных господарствах.

Инший дослїдователь обчислил, килько кильметров дороги робит газдыня при господарстві, трудячи ся от свита до ночи, аджек около 15—16 годин денно. Обрахунок выпал интересно. Оказало ся, же газдыня робит около 50 км. дороги каждого дня. Не єст то цыфра невіроятна, если ся розважит, же нормально человек, идучи поволи, може перейти за годину 4 км., што робит в 10 годинах 40 км. Лем же не числимє того крученя ся коло дому и не здаєме собі ани справы с того, килько дороги „переміряє“, знаєме лем одно, же ноги вечером нас болят, сут набырмілы и горячи, як бы дакто налял до них огня, же наконец начинают показовати ся перши погрубленя жил и стали опухненє, неомыльный знак частой хвороты и жен, так зване „росширенє жил“.

А однак можна было бы не допустити до тых послїдствий, можна бы было урядити собі так житє, и такой лад в господарстві запровадити, же было бы всьо на час зроблене, нич бы ся не марновало и на отпочинок нашло бы ся кус часу.

До такого урядженя житя, полного ладу и спокою потреба спостерегательности и доброй организации. Основом доброй организации єст передовсем спостерегательность газдыні, котра при обдуманю пляну работы мусит памятати о каждой дробниці и мусит обдумати всьо точно. Перед ей оком не може ся нич укрити, каждая неточность в работі буде спостережена и каждый непорядок або зміна місца чоғонибудь зверне ей увагу.

На той то спостерегательности и увазі полягат ціла штука рядженя, цілый лад и порядок. Спостерегательность єст у людей вроджена, але можна ю также набыти и выробити через безпрестанне вправленє увагы и стали обсервацию окружающого нас житя. Тота привычка до звертаня увагы на подробности звязаны с господарством и домашним порядком улегчит нам работу и ощадит непотребной страты часу на гляданє складаных шторах в инше місце річей.

Газдыня, котра памятат, штобы каждая річ мала своє місце и была все на том місци, штобы каждая работа была зроблена в своем часі, газдыня, котра уміє роспляновати и розложити работу, буде мати значно меньше работы и найде все свободный час на отпочинок и прочитанє книжки ци газеты.

Што чути в світі.

По обчисленням опертым на дотеперешних комуникатах страты в войні италианско-абисынської сут слідуєчи: абисынчики стратили 17 тисяч убитых, 16 тисяч раненых и 1200 плінных, а италиане 5 тисяч убитых, 4500 раненых и 900 плінных.

Италия має наміренє в провинции Тигре, належачой до Абисынии посадити на королевском престолі Раса Гуксу, зятя абисынского цисара и потомка цисарской родини, котрый с цілом своей арміом перешол на сторону Италии. Має то быти нагорода за зраду Абисынии. Друга така империя абисынська под Раса-Гуксом находила бы ся в том отношеню до Италии, як Манжурия до Японии.

Лига Народов ухвалила на конференциі закрити кредиты и позичкы для Италии.

Цисар Абисынии звернул ся до головы церкви абисынской с порученєм оголошеня святой войны против Италии.

Через Суезкый Канал переплыло со вхосной Африкы около 10.000 италианских вояков, хворых на малярию, вертаючих до Италии.

Италиане в часі самолетных атак в полуднево-вхосной Абисынии метали бомбы с труючими газами, котры убили цілы громады домашных звірят, головно верблюды, козы и овцы. Втраты обчисляют на около 50.000 штук.

В Стамбулі (Турция) выкрыто цікаву аферу шпюнку. До переносеня шпюнской кореспонденциі уживано тресованы коты.

Бомбай: Правительство Индий робит приготвленя до мобилизации. Урляпы гиндуских и бритыйских офицеров откликано. Сут роблены приготвленя до транспорта войск до Африкы.

Білград: В рочницу убийства короля Александра отбыли ся в цілой Югославиі заупокійны торжества. Над гробницом убитого короля отслужено панихиду в присутстві королевской родини. По богослуженю молодой король Петро II. зділал перегляд своей гвардии.

В Чехословакиі отобрано почтовый дебит „Газеті Польской“, выходячой в Варшаві и газеті „Наш край“ выходячой в польском Цешині.

С Женевы доносят, же Германия не прийме участі в санкциях против Италии.

Румунскы газеты поміщают, же пакт приязни польско-румунский не был выповідженый в передвидженом часі, в виду чого єго постановленя обавязуют на дальших 5 літ.

Москва. Недалеко Москвы згинул в автомобильной катастрофі оден с убийцов цара

Николая II. и царской родини, тепер высший советский урядник Владимир Яковлев. Автомобиль, в котром іхал Яковлев станул нагло цілый в поломени и Яковлев спалил ся.

В середно-азийской советской республиці Таджикистан было землетрясенє, в послідстві чого завезла ся гора. Число жертв выносит 170 убитых 360 тяжко раненых. Всі дороги и телефоничны полученя сут перерваны и комуникацію удержує ся лем при помочи самолетов.

Вісти с краю.

Варшава: Начальник Выділа Социально-Политичного в Воєводском Уряді в Кракові д-р Петро Малашинский одержал номинацію на вицевоєводу краковского.

Варшава: Медженародный Червены Крест повідомил Польский Червены Крест, же помоч санитарна для Абисынии може быти уділяна без перешкод через всі народны организации Червеного Креста. До Абисынии можна высылати бандажны материалы и лікарства а также охотничьи отділы Червеного Креста.

Судя слідчий в Варшаві поручил арестовати двох подваршавских селян, Майдана и Шпецяка, котры приказали своим дітям підбичи под переїзджаюче авто. Хлопцы отнесли невеликы раны. Злочинным отцам ходило о одержанє отшкодованя за раны, каліцтво, а може и смерть своих дітей.

Варшава: Правительство приготвлят проект амнестийного закона, выробленого уж министерством правосудия. Подробности того закона сут держаны на разі в тайні

Варшава: Рада Министров на засіданю 17. т. м. ухвалила проект закона, уповажняючого П. Президента Р. П. до выдання декретов в области господарчих и финансовых справ с выключенєм зарядженя П. Президента Р. П. о стабилизации злотога с дня 13. жолтня 1927 р.

Крыница: Дня 13. т. м. побил Франек Шипула ножом так сильно господаря с Крыницы села, Павла Шевчика, же помимо безотложной лікарской помочи Павел Шевчик умер дня 18. т. м. Шипулу полиция арестовала и находит ся он в арестах мушинского суда.

КТО ХОЧЕ ЗАБЕЗПЕЧИТИ СЯ
НА СТАРОСТЬ, АБО ЗЛОЖИТИ ДІТЯМ
ПРИДАНЕ, НАЙ
заасекує ся
в Асек. Товаристві
Вита и Краковске
во ЛЬВОВІ

НЕ ЗАБУДМЕ, ЖЕ В НЕДІЛЮ ДНЯ
3. ЛИСТОПАДА
о год. 12-той отбуде ся в Флоринці
в дому Василя Дубца
основательне собрание
МОЛОЧАРНІ.

На собраню будут выголошены
рефераты.

Во власном интересі просит ся всіх
о численну участь в собраню.

В ЗИМІ ОТБУДЕ СЯ В КРЫНИЦІ СЕЛІ
КУРС ТКАЦКЫЙ

Оплата за науку на курсі выносит 2 зл.
Участники курсу не достають помещеня
и удержаня. Курсанты мусят пригот-
вити льняну, або волняну пряджу. Му-
сят они собовязати ся перестерігати
рыгор школьный.

Зголошеня приймає администрация
газеты Лемко в Крыници.

Важне для читалень и аматорских кружков!

В КРЫНИЦІ-СЕЛІ ОТБУДЕ СЯ ДВО-МІСЯЧНЫЙ

КУРС ДЫРЫГЕНТОВ ХОРОВ.

Курс начне ся 1. листопада т. р. и обийме теорию и прак-
тику потребу до веденя аматорских хоров. Буде учить ся
также церковного співу.

Оплата за науку на курсі выносит 20 злотых.

Курсанты с инших сел достанут помещенє, без удержаня.
Удержанє мусит покрити сам курсант.

Кромі того устроє ся в том самом часі также

ВЫСШИЙ КУРС

для тых, котры уж в прошлом року окончили курс низший.
Оплата за курс высший выносит 25 злотых.

Зголошеня приймає

г-н Александер Ропицкий в Крыници Здрою
(дом г-на Александра Поглида)